

萬有文庫

第二集七百種

王雲五主編

大方廣佛華嚴經

(四)

實叉難陀譯

澄觀撰述

商務印書館發行

大方廣佛華嚴經

(四)

實叉難陀譯
澄觀撰述

國學基本叢書

大方廣佛華嚴經疏鈔懸談卷二十三

第六宗趣通別者。語之所尙曰宗。宗之所歸曰趣。先明其通。後顯於別。

前中通論一代佛教。諸部異計各是一宗。謂十八本二各不同故。以義相從。更復合之。

諸部異計卽二十部。言十八本二者。十八部名次下當列。本二者。卽上座部。及大衆部。故文殊問經云。十八及本二。皆從大乘出。無是亦無非。我說未來起。以義相從者。合二十部兼諸大乘爲十宗故。

然隋朝大衍法師總立四宗。一因緣宗。謂薩婆多。二假名宗。謂卽經部。三不眞宗。謂諸般若。四眞實宗。謂法性眞理佛性等教。

然隋朝下。先正立。各從所立得名。四中各有二句。上句立義。下句指教。

又此四宗。初名立性。二名破性。三名破相。四名顯實。

又此四宗下。二辨異名。四名不出性相。而前三從所破。從一就所顯。

初二小乘下。二大乘。各初淺後深。此亦有理。但收義不盡。以十八部中但判二故。

初二小乘下。辨順違二。先順釋明順理。初淺後深者。以初顯正因緣。立有緣果之性。故爲淺。二破於定性。但從緣有。故爲深也。萬法從緣。故無定實。如鐵之堅。遇火則鎔。如水之溼。遇寒則堅。明知從緣則無定性。假名而已。故爲小乘深。早已參涉大乘。故云經部。三是大乘之淺。望其第二。亦是次深。以二但破性而有其相。以會指成拳。雖無定性。非無拳相。今復破之。明性相俱空。爲法空矣。而言淺者。但除妄計。

以顯空義。未彰妙有不空真性。故名爲淺。第四方顯妙有真性。故四爲深。此亦有理者。自淺之深。先小後大。一代佛教。大意爾故。又第一宗是因緣所生法。第三宗則我說卽是空。第二宗亦爲是假名。第四宗亦是中道義。故無大違。○但收義不盡下。第二約局明違。言但判二者。唯明有部及經部故。除本部。故云十八部中。

今總收一代時教以爲十宗。

第一我法俱有宗。謂犢子部等。彼立三聚。一有爲。二無爲。三非二聚。非二卽我。又立五法藏。謂三世爲三。無爲爲四。第五不可說藏。我在其中。以不可說爲有爲無爲故。然此一部。諸部論師共推不受。呼爲附佛法外道。以諸外道所計雖殊。皆立我故。

謂犢子部等者。等取餘四部。謂此計中總有五全。或一少分。言五部全者。一犢子部。二法上。三賢胃。四正量。五密林山。故總爲五部同計。言一少分者。泰法師云。更等取經部中根本經部。不等末經部。以本經部亦執有勝義我。非卽非離。卽計菩薩出離生死故名勝義。

二法有我無宗。謂薩婆多等。彼立諸法不離色心。或立三世無爲。或分五類。皆無有我。以無我故。異外道計。

二法有我無疏文分二。先正立。言等者。等取餘二半。謂此計都有三全一少分。謂一切有部。二雪山部。此卽上座部。宗輪論云。多同說一切有故。亦等取也。三多聞部。宗輪敘多聞部云。餘義多同一切有部。並不立我。計法有實故。言一少分者。化地部末計。彼云過去未來並皆實有。亦有中有一切法所

知所識。故名法有我無。

又於有爲之中立正因緣。以破外道邪因無因。

又於有爲下。二辨教功能有五。一總顯功能。因緣能破無因。正因以破邪因。

然西域邪見雖九十五種。或計二十五諦從冥生等。或計六句和合生等。或謂自在梵天等生。或謂時方微塵虛空宿作等。而爲世間及涅槃本。

然西域邪見下。先束九十五種爲十一宗。九十五種。如第六迴向引。然至妙虛通。目之曰道。心遊道外。卽稱外道。唯佛正道。餘悉名外。故此總非。所以成十一者。約現有教文傳習因域故。○或計二十五諦者。卽十一中之一計也。此卽數論師計。按金七十論中。謂有外道名劫毘羅。此云黃赤色。髭髮面色並黃赤故。時世號爲黃赤仙人。其人從空而生。自然四德。一法。二智。三離欲。四自在。得此智已。依大悲說。先爲阿修和仙人說。阿修和傳與般尸訶。般尸訶傳與羯伽。羯伽傳與優樓伽。優樓伽傳與跋婆和。跋婆和傳與自在黑般尸訶。廣說此智。有六十千偈。其自在黑姓拘式。見大論難受。略抄七十偈。此婆羅門初入金耳國。以鐵鑊鑊腹。頭戴火盆。聲王論鼓。求僧論議。因諍世界初有後無。謗僧不如。遂造此七十論。申數論宗。王意朋彼。以金七十斤。賜之外道。彰己令譽。遂以金七十標名。唯識疏云。其後弟子之中上首。如十八部中之部主者。名代理沙。此翻爲雨。雨時生故。卽以爲名。徒黨名雨衆者。卽義當自在黑所受跋婆和。梵音不同耳。梵音僧佉。此翻爲數。數卽慧數。數度諸法根本立名。從數起論。名爲數論。論能生數。亦名數論。其造數論及學數論者。皆名數論師。本源卽是迦毘羅造金七十論。卽自在黑造。

偈、長行即天親菩薩解釋。言二十五諦者。准百論云。從冥生覺。從覺生我心。從我心生五微塵。從五微塵生五大。從五大生十一根。神爲主。常覺相處中。不壞不敗。攝受諸法。斯則五大亦爲能生。今依金七十論釋二十五諦。總略爲三。處中爲四。廣爲二十五。言略爲三者。謂一自性。二我知。三變異。自性是第一諦。古稱冥性。亦名勝性。未生大等。但住自分。名爲自性。若生大等。便名勝性。用增勝故。智論云。外道通力至八萬劫。八萬劫外冥然不知。謂爲冥諦。從此覺知初立。故名冥諦。二言我知者。即第二十五諦。即神我也。三變異者。中間二十三諦。自性所作。名爲變異。故爲三位。言中爲四者。彼論云。外曰。云何分別本性變異及知者。答曰。本性無變異也。^一大等亦本變也。^二十六但變異也。^三知者非本變也。^四謂本性能生大等。故名爲本。不從他生。故非變異。二大我慢五唯。此七亦本亦變異。大從本性生。故變異。能生我慢。故爲本。慢生五唯。五唯生五大五根。故皆亦變亦本。三五大五知五業。及心平等根。但從他生。故唯變異。不能生他。故不名本。四知者。即我知爲體。故不從他生。亦不生他。故非本。非變異。若準百論。五大生十一根。則五大亦本亦異。唯變異中則唯十一根。言廣有二十五者。如上引百論。然都有九位。就其中二十三諦。自有七位。一大。二我心。三五唯量。四五大。五五知根。六五作業根。七心平等根。兼其初後。故二十五。問曰。自性不可見。云何知有答。有法有微細。故不可見。如熱氣散空。豈得言無。若不見。云何知有答。因大等事。從自性生。有三德故。問。自性云何能與諸法爲生。因答。三德合故。其三德在冥性中。眠伏不起。在大等二十三位。便有覺悟。故二十三一一皆以三德合成。言三德者。梵云薩埵。刺闍。答摩。薩埵此云有情。亦云勇猛。今取勇義。刺闍此云微。牛毛塵等皆名刺闍。亦名塵埵。今取塵義。答摩此云闇。

卽闡純之闡。三德應名勇塵闡。若傍義翻。舊云染麤黑。新云黃赤黑。舊名喜憂闡。新云貪瞋癡。舊名苦樂癡。新云苦樂捨敵體而言。卽是三毒。能生三受。名苦樂捨。黃赤黑者。是其色德。貪多輕光。故色黃。瞋多動躁。故色赤。癡則重覆。故其色黑。由此自性合三德。故能生諸法。故自性是作者。我非作者。若非作者。何用我爲。答爲證義。故義之言境。證於境故。謂二十四諦是我所知。故我是見者。而非作者。除不能知。問自性是作。我非作者。何因和合。偈中答云。我求見三德。自性爲獨存。如跛盲人合。由義生世間。謂我有如是意。我今當見三德。自性。故我與自性合。自性爲獨存者。我是困苦人。唯有能見知。今當爲彼。令得獨存。以是義故。自性與我合。如人與王合。如盲與跛合。則以我爲跛。不能作故。自性爲盲。不能見故。此二合故。能生世間。與我受用。盲跛達其所在。各得分立。我見自性時。卽得解脫。令我獨存。問曰。已說和合能生。是生次第云何。答曰。自性次第生。大我慢十六。十六內有五。從此生五大。謂自性先生。大者增長之義。自性相增故。或名覺。或名想。或名徧滿。或名智。或名慧。大即是智。故大得智名。大次生我執。我執者。自性起用。觀察於我。知我須境故。亦名我慢。亦名五大初。或名轉異。或名炎熾。次慢生十六者。卽五唯量。五知根。五作業根。及心平等根。此意總明。皆從慢生。就十六中。應先生五唯。五唯生十六。故云十六內有五。從此生五大。卽百論從我心生五微塵。從五微塵生五大。從五大生十一根。初生五唯量者。一聲。二觸。三色。四味。五香。五各有體。有能生緣量故。唯亦定義。唯定用此成五大故。五唯無差別。以微細寂靜故。從此生五大大塵有差別。五唯無差別。卽是大塵。大無憂癡。唯以喜樂故。五大具三毒故。差別。從聲唯生空大。別有一物名之爲空。非空無爲。觸唯生風大。色唯生火大。味唯生水大。香

唯生地大金七十論但各一生有說藉塵有多少。從聲一塵成空大。聲觸二塵生風大。色聲觸三生火。大色聲觸味生水大。總用五塵生地大。藉塵多者力弱。藉塵少者力強。故四輪成世間。空輪最下。次五大生十一根者。先生五知根。次生五作業根。後生心平等根。云何五大生五知根。謂聲唯生空大。空成耳根。是故耳根還聞聲。觸唯生風大。風成身根。是故身根還受觸。色唯生火大。火成眼根。是故眼根還見色。味唯生水大。水成舌根。是故舌根還知味。香唯生地大。地大成鼻根。是故鼻根不聞地而聞於香。而金七十論但云耳根唯從聲唯生。與空大同類。是故能取聲。若優樓迦仙人則計徧造義。謂五大造眼根。而火大偏多。色是火家求那。故眼根唯能見色。餘四例知皆用五大成。各一偏多耳。次生五業根者。金七十論卽總用五大成。謂一語具。二手。三足。四小便處。五大便處。此中語具謂口舌等。手足卽分皮根少分。彼謂身根爲皮根。又男女大遺等各有用故。故偈云。唯見色等塵。是五知根事。言執步戲除。是五業根事。心平等根者。金七十論分別爲體。故論云。分別爲心相。是相卽心事。亦具五唯成。通緣諸境故。又論云。大我慢心事。三自相爲事。心能徧取差無差別境故。有說以肉團心爲體。二十五我知者。以思爲體。唯識因明皆云。數論執思爲我。若金七十云。云何知有我。頌曰。聚集爲他故。異三德依故。食者獨離故。五因立有我。一如有人聚牀席等。必爲於人。如是大等聚集。卽知有我。二異三德者。前二十四皆有。三德故。三依故者。如人依身。身則有用故。四食者。如人見味。知有別味人。見大等所知。必知有能知。五獨離故者。離身若唯有身。聖人所說解脫。則無有用。故知有我。我有何相。然金七十論將自性望變異。有九不似。有六相似。我翻似不似。言九不似者。一無因。二常。三多人共。一四徧一切。五無事。六

不沒、七無分、八不依他、九不屬他。自性有此九德，不似變異。變異則有因等。我有八義同於自性，不似變異。但多人共一義，不同自性。謂人人各有我故。自性有六義似變異。一同有三德，二不相離，謂三德不可分。三皆爲我所受用之塵。四平等俱爲一切我受用。如一婢多主使。五無知者。本末同無知。唯我知故。六能生。自性能生。大等亦能生故。而我知亦無此六相似。故總云我翻似不似。謂亦無三德。不能生等故。我有八不似變異。乃成八德。無六似於變異。但成二德。一無三德。二是知者。餘之四似是自性變異之德。非我之德。餘義可知。有云由三德是生死因。由所轉變擾亂我故。不得解脫。知二十三諦轉變無常。生厭修道。自性隱迹。不生諸諦。我便解脫。金七十云。人無縛無脫。無輪轉生死。以無三德故。無變異故。無作者故。若爾誰得解脫。答輪轉及繫縛。解脫唯自性。由自性變異故。縛若得正徧知。卽得解脫。意明知二十五諦爲正徧知。明縛與脫不由於我。言我解脫者。約自然脫耳。論總結云。此祕密智應施五德婆羅門。一生好地。二好姓族。三行。四有能。五欲得上依。金七十論略敍其計。其間不同。兼智論意並已具釋。若廣破者。如唯識中百等論下疏略總破耳。○或計六句者。卽衛世師計。新云吠世史迦薩多羅。此云勝論。吠世亦云鞞世。吠世爲正。立六句義。最爲勝故。或勝人所造論故。其能造人。卽成劫之末。人壽無量。外道出世。名喞露迦。此云喞鷲。晝避聲色。匿迹山藪。夜絕視聽。方行乞食。時人以爲似鵲鷲鳥。故名喞鷲仙人。卽百論優樓伽也。或名羯拏僕。羯拏云米齋。僕翻爲食。先爲夜遊。驚他稚婦。乃不夜乞。遂收場碾糠粃之中米齋而食。故時號爲食米齋仙人。多年修道。遂獲五通。謂證菩提。便欣入滅。但嗟所悟未有傳人。愍世有情癡無慧目。乃觀七德。授法令傳。一生中國。二父母俱是婆羅門姓。三

有般涅槃性、四身相具足、五聰明辨捷、六性行柔和、七有大悲心、經無量時、無具七德、後經多劫、婆羅
 疵斯國有婆羅門、名摩納縛迦、此云儒童、其童有子、名般遮尸棄、此云五頂、頭髮五旋、頭有五角、其人
 七德雖具、根熟稍遲、既染妻孥、卒難化導、經無量歲、伺其根熟、後三千歲、因入園遊、與其妻室競花相
 忿、鵲鵲因此乘神通化之、五頂不從、仙人且返、又三千歲、化之不得、更三千歲、兩競尤甚、相厭既切、仰
 念空仙、仙人應時神力化引騰空、迎往所住山中、與說所悟六句義法、一實、二德、三業、四大有、五同異、
 六和合、實者、諸法體實、德業所依、名之爲實、德業不依有性等故、德者道德、業者作用、動作義也、實有
 九種、一地、二水、三火、四風、五空、六時、七方、八我、九意、德有二十四、一色、二香、三味、四觸、五數、六量、七別
 性、八合、九離、十彼性、十一此性、十二覺、十三樂、十四苦、十五欲、十六瞋、十七勤勇、十八重性、十九液性、
 二十潤、二十一行、二十二法、二十三非法、二十四聲、業有五種、一取、二捨、三屈、四申、五行、大有唯一、實
 德業三同、一有故、離實德業外別有一法爲體、由此大有有實等故、同異亦一、如地望地有其同義、望
 於水等、卽有異義、地之同異、是地非水、水等亦然、亦離實等有別實體、和合句者、謂法和聚、由和合句、
 如鳥飛空、忽至樹枝、住而不去、由和合句故、令有住等、上已略敍、廣出體相、及廣破斥、並如唯識及疏
 文并百論等、○或謂自在梵天等生者、此有三計、一卽塗灰外道、并諸婆羅門、共計自在天是萬物之
 因故、唯識第一云、有執有一大自在天體實徧常、能生諸法、謂彼計此天有其四德、一體實、二徧、三常、
 四能生諸法、又計有三身、一者法身、體常周徧、量同虛空、能生萬物、二受用身、在色天之上、三變化身、
 隨形六道、教化衆生、復計彼天有二住處、一在雪山、二在南海末刺耶山、昔摩竭國有兄弟二人、事自

在天。同往雪山求見彼天。至山。忽見一婆羅門。云大自在天是汝國釋迦牟尼佛。何不禮事。兄弟報云。我先承習。但事天神。時婆羅門變爲天形。面上三目。復現四臂。或現八臂。告兄弟曰。汝可還國。菩提樹東。造釋迦降魔之像。菩提樹後穿一池。濟渴乏者。彼宗因此計二住處以爲不謬。瑜伽第七云。彼作是思。世間諸物。必應別有作者。生者及變化者。爲彼物父。謂自在天。或復其餘。如論廣破。顯揚第十亦同。此說十二門論亦廣破之。○二言梵天等生者。卽第四圍陀論師計。及第五安茶論師。圍陀云。明此師計。那羅延天能生四姓。此計梵天能生萬物。提婆菩薩破外道小乘涅槃論云。從那羅延天。齋中生大蓮花。蓮花之上。有梵天祖翁。謂梵天爲萬物之祖。彼梵天作一切命。無命物。從梵天口生。婆羅門。兩臂生。刹利。兩脰生。毘舍。兩脚生。首陀。故瑜伽第七云。婆羅門是最勝種類。刹帝利等是下劣種類。婆羅門是白淨色類。餘種是黑穢色類。婆羅門種得清淨。非餘種類。婆羅門是梵王子。從大梵腹口所生。梵所變化。梵王體胤。廣破如彼。顯揚亦同。故上等言。等取那羅延天。以那羅生梵。梵爲物祖。故正云。梵天生。等取那羅延。又等梵王。是第五計安茶論師計。本際也。言本際者。卽過去之初首。謂計世間最初唯有大水。時有大安茶出生。形如雞卵。金色。後爲兩段。上爲天。下爲地。中生一梵天。能作一切有命無命物。是故梵天是萬物因。以四五兩計。一計那羅延爲始。一計安茶爲始。並次生梵王。梵王生萬物。故疏云。梵天等生。卽等取安茶及那羅也。其安茶計。亦似此方有計天地之初形如雞子。渾沌未分。卽從此生天地萬物。○或謂時方下。此有六計。一時者。卽時散外道。執一切物皆從時生。是故時是常。是一是萬物因。是涅槃因。廣百論云。復次或有執時是真實常。以見種植等衆緣和合。有時生果。有時不生。時

有作用、或舒或卷、令彼條等隨其榮悴。此所說因、具有離合、由是決定知實有時。廣破如彼。百論亦云、如是時雖微細不可見、以節氣花實等故。知有時。此則見果知因。○次言方者、卽第七方論師計。計方生人、人生天地、滅後還入於方。故方是常。是一是萬物因。是涅槃因。故百論云、外曰實有方、常相有故。曰合處是方相等。○言微塵者、卽第八路迦耶論師計。色心等法皆極微所作。路迦耶、此云順世外道。計一切色心等法皆用四大極微爲因。然四大中最精靈者、能有緣慮、卽爲心法。如色雖皆是大、而燈發光、餘則不爾。故四大中有能緣慮、其必無失。故唯識云、有外道執地水火風極微實常、能生麤色。所生麤色、不越因量。雖是無常、而體實有。釋曰、謂從四大生、後還歸大。而言麤色者、卽是子微。不越因量者、因者父母微。最初極微名爲父母。聚生諸色。故所生者名曰子微。子微雖是無常、不越父母。故是實有。亦廣如彼破。但是隨情虛妄計度。顯揚第九云、又計極微是常住者、以依世間靜慮起如是見。由不實知緣起。故計有爲先有果集起。離散爲先有果壞滅。由此因緣、彼謂從衆微性麤物果生。漸析麤物乃至極微。是故麤物無常、極微常住。瑜伽同此。○言虛空者、卽第九口力論師謂虛空爲萬物因。別有一法是實是常。是一是萬物因。從空生風。從風生火。從火生煖。煖生水。水生凍。堅作地。地生五穀。五穀生命。命沒還歸空。是故虛空爲一切萬物因。是涅槃因。百論亦云、外曰定有虛空法、亦常亦徧、亦無分一切處。一切時。信有故等。廣如彼破。○言宿作者、卽第十宿作論師計。一切衆生受苦樂報皆隨往日本業因緣。是故若有持戒精進、受身心苦、能壞本業。本業既盡、衆苦盡滅。衆苦盡滅、卽得涅槃果。是故宿作爲一切因。瑜伽論云、何因緣故、彼外道作如是見。立如是論答。彼見世間雖具正方便而招於苦。

雖具邪方便而招於樂。彼如是思。若由現法士夫作用爲彼因者。彼應顛倒。由彼所見非顛倒故。是彼諸法皆以宿作爲因。由此理故。起如是見。立如是論。涅槃三十五廣破此見。○而疏云等者。等取第十一無因論。計一切萬物無因無緣。自然生。自然滅。故此自然是常。是萬物因。是涅槃因。此計一切無染淨因。如棘刺自織。烏色非染。鶴色自白。大乘法師云。別有一法。是實是常。號曰自然。能生萬物。與下方計有同義。瑜伽第七云。何因緣故。彼諸外道起如是見。立如是法。答。謂見世間無有因緣。或時歛爾大風卒起。或時一日寂然止息。或時忽爾暴沙瀾漫。於一時間頓卽空竭。或時鬱爾果木敷榮。或一時間颯然衰頓。由如是故。起如是見。立無因論。顯揚亦同。此則無因爲自然。非別有物。若廣分別上諸異計。如瑜伽六七。顯揚九十。婆沙十一二。及金七十廣百論等。

統收所計。不出四見。謂數論計一。勝論計異。勒沙婆計亦一。亦異。若提子計非一。非異。若計一者。則謂因中有果。若計異者。則謂因中無果。三則亦有亦無。四則非有非無。餘諸異計皆不出此。統收所計下。第二束十一爲四計。於中二。先正明所計。後對因果明。皆廣如百論。雖多不同。就其結過。不出二種。從虛空自然生。卽是無因。餘皆邪因。

雖多不同下。第三結歸二因。卽收上十一宗計。乃至九十五種。皆不出二因。無而忽有。是曰無因。所計虛謬。是曰邪因。如乳生酪。乳曰正因。令乳生。癭卽曰邪因。從無明行而生此身。是曰正因。從冥性等皆是邪因。一切諸法緣會而生。緣離則滅。未有一法不從因生。情非情境並從因生。而言無因。乃成大過。謂不應生物。則合常生。石女則應生兒。龜毛亦應生物。不修萬行。應得涅槃。則世出世法一時俱壞。故

無因過、過莫大焉。配屬可見。離佛法外。非唯九十五種。設千般異說。皆不出無因邪因。故說一正因緣。無計不破。

大方廣佛華嚴經疏鈔懸談卷二十四

此方儒道二教亦不出此。如莊老皆計自然。謂人法地、地法天、天法道、道法自然。

如莊老下二引文。然此方儒道玄妙不越三玄。周易爲真玄。老子爲虛玄。莊子爲談玄。今先引老子。義引莊子。故云皆計自然。此標也。莊子云。不知所以然而然。故曰自然。謂人法地下。卽老子道經有物混成章。此先有言云。有物混成。先天地生。寂兮寥兮。獨立而不改。周行而不殆。可以爲天下母。吾不知其名字之曰道。強爲之名曰大。大曰逝。逝曰遠。遠曰反。故道大天大地大。王亦大。注云。因其所大而明之。得一者天地王也。天大能覆地。地大能載王。大能法地。則天行道。故云亦大。又云。域中有四大。而王居其一焉。注云。王者人靈之主。萬物繫其興亡。將欲申其鑒誠。故云而王居其一。欲警王令有所法也。次文云。人法地、地法天、天法道、道法自然。注云。人謂王也。爲王者先當法地安靜。旣爾又當法天運用生成。旣生成已。又當法道清淨無爲。令物自化。人君能爾者。卽合道法自然之性也。又上釋道大云。以通生表其德。字之曰道。以包含目其體。強名曰大。此文相躡。故委引之。意在道法自然耳。德經又云。道生一。一生二。二生三。三生萬物。前則逆推。此則順辨。注云。一者冲氣也。言道動出冲和妙氣。於生物之理未足。又生陽氣。陽氣不能獨生。又生陰氣。積冲氣之一。故云一生二。積陽氣之二。故云二生三。陰陽合孕。冲氣調和。然後萬物阜成。故云三生萬物。次下又云。萬物負陰而抱陽。冲氣以爲和。上來皆明萬物自然生也。卽老子言。若引莊子者。莊子太宗師篇云。夫道有情有信。無爲無形。注云。有無情之情。故無爲。

也。有常無之信。故無形也。又云可傳而不可受。注云。古今傳而宅之。莫能受而有之也。又云可得而不可見。注云。咸得自容而莫見其狀也。又云。自本自根。未有天地。自古以固存。注云。明無不待有而無也。又云。神鬼神帝。生天生地。注云。夫無也。豈能生神哉。不神鬼帝。而鬼帝自神。斯乃不神之神也。不生天地。而天地自生。斯乃不生之生也。故夫神之果不足以神。而不神則神矣。功何足有。事何足恃哉。又云。在太極之先。而不爲高。在六極之下。而不爲深。先天地生。而不爲久。長於上古。而不爲老。注云。言道之無所不在也。故在高爲無高。在深爲無深。在久爲無久。在老爲無老。無所不在。而所在皆無也。又云。狶韋氏得之以挈天地。伏羲得之以襲氣母。維斗得之終古不忒。日月得之終古不息。堪坏得之以襲崑崙。馮夷得之以遊大川。肩吾得之以處大山。黃帝得之以登雲天等。注云。道無能也。此言得之於道。乃所以明其自得耳。又云。知天之所爲。知人之所爲者。至矣。注云。知天人之所爲者。皆自然也。則內放其身。而外冥於物。與衆玄同。任之而無不至也。意云。但有知有爲。皆不爲而爲。故自然也。若以自然爲因。能生萬物。卽是邪因。若謂萬物自然而生。如鶴之白。如鳥之黑。卽是無因。若以自然爲因等者。二斷義也。通其兩勢。初卽老子意。由道生一道。是自然。故以道爲因。是邪因也。若謂萬物自然而生。下出莊子意。則萬物自然。無使之然。故曰自然。卽無因也。如鳥之黑等者。卽莊子文亦涅槃經意。

周易云。易有太極。是生兩儀。兩儀生四象。四象生八卦。八卦定吉凶。吉凶生大業者。周易云。下二引周易文中亦二。先引文。卽繫辭言。繫者。繫屬也。亦綱系也。此上尙有是故二字。注云。

夫有必始於無、故太極生兩儀也。太極者、無稱之稱、不可得而名、取其有之所極、况之太極者也。孔云：太極、天地未分之前、混而爲一、卽是太初太一也。老子云：道生一、卽此太極。謂混元既分、卽有天地、故云太極生兩儀。卽老子一生二也。不言天地者、指其物體、下與四象相對、故云兩儀。謂兩體容儀也。釋曰：若準列子、有太易太初太始太素。太易者、未見氣也。太初者、氣之始也。太始者、形之始也。太素者、質之始也。彼注云：質、性也。又釋太易指周易太極、此則太初非太易、便成太極在初。若准易鈞命訣說有五運、前四同列子第五名太極、則太極非初。釋與列子大同。運卽運數、易爲改易、元氣始散、謂之太初。氣形之端、謂之太始。形變有質、謂之太素。質形已具、謂之太極。雖小異同、皆是元氣生天地耳。兩儀生四象等者、孔云：謂木金水火稟天地而有、故云兩儀生四象。土則分王四時、又地之別、故唯四象。四象生八卦者、謂震木離火兌金坎水各主一時、又巽同震木、乾同兌金、加之以坤艮之土、爲八卦也。八卦定吉凶者、八卦既立、爻象相推、有吉凶故。吉凶生大業者、萬事各有吉凶、廣大悉備、故能生天下大事業也。

太極爲因、卽是邪因。若謂一陰一陽之爲道、卽計陰陽變易能生萬物、亦是邪因。若計一爲虛無自然、則亦無因。

太極爲因等、二斷義也。謂若用太極爲因、故是計無爲有、亦是邪因。若謂一陰下、通顯邪因無因、易云：一陰一陽之謂道、陰陽不測之謂神。一陰一陽之謂道者、注云：道者何、無之稱也。無不通也、無不由也。况之曰道、寂然無體、不可爲象、必有之用極、而無之功顯、故至乎神無方而易無體、而道可見矣。故窮